

**इवनिंग डोगरी न्यूज़ बुलेटिन  
समे .18:15 Hrs**

<><><><><><>

**Headlines**

1. राष्ट्रपति द्रोपदी मुर्मू होर अंतरराष्ट्रीय महिला दिवस दे मौके पर नमीं दिल्ली च इक सम्मेलन दा उद्घाटन करडन जिसदा विशेषार ऐ नारी शक्ति से विकसित भारत।
2. मुखमन्त्री उमर अब्दुल्ला होरें अज्ज विधानसभा च ब'रे 2024-25 लेई आर्थिक सर्वेक्षण रिपोर्ट पेश कीती।
3. मुखमन्त्री उमर अब्दुल्ला होरें आखेआ ऐ जे सरकार कुपवाड़ा जिले दी बंगस थाहै गी इक सदाबहार थाह दे तौर पर विकसित करने दी योजना बना करदी ऐ।
4. काबीना नै जम्मू-कश्मीर लेई कम्मै-कारवाइयें मतल्लक नियमें गी मंजूरी देई दिती ऐ।
5. सकीना इत्तू होरें आखेआ ऐ जे सरकार नै लोकें दी स्थूलतें आस्तै आनलाइन रेवन्यू पोर्टल गी तैयार कीता ऐ।

<><><><><><>

**Prez. Women Conference**

राष्ट्रपति द्रोपदी मुर्मू होर इस म्हीने दी 8 तरीक गी अंतरराष्ट्रीय महिला दिवस दे मौके पर नमीं दिल्ली च इक राष्ट्रीय सम्मेलन दा उद्घाटन करडन। इस सम्मेलन दा आयोजन महिला ते बाल विकास मंत्रालय आसेआ कीता जा'रदा ऐ जिसदा विशेषार ऐ "नारी शक्ति से विकसित भारत"। इस कार्यक्रम च बक्ख-बक्ख खेतरें दी महिला हिस्सा लैडन जिंदे च हथियार बलें ते अर्ध सैनिक बलें ते दिल्ली पुलिस दे अफसरें सने My Bharat Volunteers , आंगनवाड़ी वर्कर, आशा वर्कर ते आप सहायता समूह दे मिम्बर शामिल होडन। इस कार्यक्रम च विश्व बैंक, UNICEF, UNDP ते UNFPA जनेह् अंतरराष्ट्रीय संगठन दे नुमाइंदे बी शामिल होडन। 'She builds bharat' दे हैशटैग कन्ने सोशल मीडिया अभियान बी आयोजित कीता जा'रदा ऐ।

<><><><><><>

**CM-Eco Survey Report**

मुखमन्त्री उमर अब्दुल्ला जिंदे कश खजाना मैहकमे दी जिम्मेदारी बी ऐ, होरें अज्ज विधानसभा च ब'रे 2024-25 लेई आर्थिक सर्वेक्षण दी रिपोर्ट पेश कीती। मुखमन्त्री होरें आर्थिक सर्वेक्षण रिपोर्ट दी इक कॉपी गी सदन-पलट पर रखेआ। आकाशवाणी दे जम्मू संवाददाता दी रिपोर्ट मूजब, ब'रे 2025-26 लेई सदन च उमर अब्दुल्ला हुंदे

आसेआ आम बजट पेश कीते जाने शा इक दिन पैहले आर्थिक सर्वेक्षण दी रिपोर्ट अज्ज सदन-पटल पर रक्खी गई। एह आर्थिक सर्वेक्षण रिपोर्ट मेद ऐ जे जम्मू-कश्मीर दे आर्थिक हालात दी तस्वीर पेश करोग।

<><><><><><>

### **CM-Bungus**

मुख्यमंत्री उमर अब्दुल्ला होरें आखेआ ऐ जे सरकार कुपवाड़ा जिले दी बंगस थाहें गी सैलसफा आहली सदाबहार थाह दे तौर पर विकसित करने दी योजना बनास करदी ऐ ते उत्थे सैलानिएं लेई किश बुनियादी स्हूलतां दस्तयाब करोआने लेई फंड बी बागुजार करी दिते गेदे न। उआं उ'नें गलाया जे इस पैसे दा इस्तेमाल जंगलात मैहकमे आसेआ दिती जा'रदिएं मंजूरिएं कन्नै जुड़े दा ऐ ते इलाकेदे योजनाबद्द ढंग्गे नै विकास लेई ई'यां करना बड़ा महत्वपूर्ण ऐ। मुख्यमंत्री होर विधायक शेख खुर्शीद हुंदे आसेआ पुच्छे गेदे सोआलै दा परता देआ करदे हे। सैलसफा मैहकमे दे प्रभारी मंत्री दी हैसियत कन्नै मुख्यमंत्री उमर अब्दुल्ला होरें विधानसभा गी दस्सेआ जे मजूदा माली ब'रे लेई इस कम्मै गिते 30 लक्ख रपे मंजूर कीते गेदे न जि'ंदे चा 24 लक्ख रपे पैहले गै जारी करी दिते गेदे न।

<><><><><><>

### **Cabinet-Business Rules**

जम्मू-कश्मीर च उमर अब्दुल्ला हुंदी अगुवाई च सरकार बनने दे तकरीबन साड्ढे 4 म्हीनें परेंत काबीना नै जंदे रोज जम्मू-कश्मीर लेई कम्मै-कारवाइएं, प्रक्रियाएं ते दिशा-निर्देशं लेई नियमें गी मंजूरी दिती जेदे मगरा हून नियमें दे इ'नें मसौदे गी लेफिटनेंट गवर्नर मनोज सिन्हा हुंदे कश मंजूरी लेई भेजेआ जाग। आकाशवाणी दे जम्मू संवाददाता दी रिपोर्ट मूजब, इनें नियमें गी सरकार दी उच्च अखितयारें आहली इक कमेटी नै मुकदा रूप दिता ऐ एहदे लेई मुख्यमंत्री उमर अब्दुल्ला हुंदी कोठी पर कल काबीना दी बैठक लाई गई ते इस दौरान जम्मू-कश्मीर लेई कम्मै-कारवाइएं मतल्लक नियमें च तरमीमें गी मंजूरी दिती गई जेड़ी पिछले तकरीबन 4 साड्ढे 4 म्हीनें थमां बकाया रौहंदी ही। इनें नियमें च संशोधन इस करियै बी जरूरी होई गेदा हा कीजे 5 अगस्त 2019 दे बाद जम्मू-कश्मीर रियासत दे बजाय केंद्र शासित प्रदेश च तब्दील होई गेदा ऐ ते असैम्बली चुनाएं दे बाद पैहली बारी इत्थे लोकें आसेआ चुनी गेदी सरकार दा गठन होए दा ऐ।

<><><><><><>

### **Cabinet-Strength**

सरकारै अज्ज आखेआ ऐ जे जम्मू-कश्मीर च मंत्री परिषद च विधानसभा दे कुल सदस्यें दे 10 फीसद शा मते लोक नेई होने लोडचदे न। आकाशवाणी दे जम्मू सांवददाता दी रिपोर्ट मूजब हंदवाड़ा दे विधायक सज्जाद गनी लोन हुंदे आसेआ पुच्छे गेदे इक सोआला दे लिक्खियै दिते गेदे परते च मुख्यमंत्री उमर अब्दुल्ला होरें गलाया जे जम्मू-कश्मीर दे परतियै गठन सबरंधी कन्न-2019 दे मताबक मंत्री परिषद च असैम्बली दे कुल सदस्यें दी गिनतरी दे 10 फीसद शा मते सदस्य नेई होने लोडचदे न। मुख्यमंत्री उमर अब्दुल्ला हुंदे पर सामान्य प्रशासनिक विभाग दी बी जिम्मेदारी ऐ।

<><><><><><>

Dy CM-Bheeni Nallah

उप-मुख्यमंत्री सुरिंदर कुमार चौधरी होंरें अज्ज आखेआ ऐ जे कठुआ जिले दे नंगला डल शिड़कें पर कलोरन च भीनी नाला उप्पर पुल बनाने लेई 5 करोड़ 83 लख 78 जहार रुपें दी लागत आहली विस्तृत परियोजना रिपोर्ट यानि डीपीआर तैयार कीती गई ऐ। उपमुख्यमंत्री होंरें डॉ. रामेश्वर सिंह हुंदे इक सुआला दा परता दिंदे होई एह गल्ल दस्सी। उप मुख्यमंत्री होंरें आखेआ ऐ जे 5 करोड़ 83 लख 78 जहार दी लागत कन्नै 75 मीटर दे पुल बनाने लेई डीपीआर तैयार कीती गई ऐ ते अगले माली बरें दौरान इसी मंजूरी देने उप्पर विचार-विमर्श कीता जा 'रदा ऐ।

<><><><><><>

Sakeena-Online Portal

सेहत ते मेडिकल शिक्षा, समाज कल्याण ते शिक्षा मंत्री सकीना इत्तू होंरें अज्ज आखेआ ऐ जे सरकार नै लोकें दी सहूलतें आस्तै बक्ख-बक्ख राजस्व सेवाएं दा लाह हासल करने लेई इक आनलाइन पोर्टल तैयार कीता गेआ ऐ। बीजेपी दे एमएलए सुरिंद्र कुमार होंरें मुख्यमंत्री उमर अब्दुल्ला हुं'दे शा एह सुआल पुट्टेआ हा जिं'दी तरफा मंत्री होंरें परता दिता। मंत्री होंरें सदन गी दस्सेआ जे राजस्व मैहकमे नै आवेदकें दी सहूलतें गी यकीनी बनाने लेई जमीनें दे इस्तेमाल च बदलाव मतल्लक सी.एल.यू दे आवेदनें लेई इक ऑनलाइन पोर्टल jrrevenue.nic.in तैयार कीता ऐ। उ'नें आखेआ ऐ जे इस पोर्टल कन्नै आवेदकें गी कुसै बी चाल्ली दी सेवा दा फायदा लैने लेई कुसै बी सरकारी दफतर च जाने दी लोड़ नेई होग।

<><><><><><>

**Illegal-Constructions**

सरकारें अज्ज आखेआ ऐ जे पैहलगाम विकास प्राधिकरण दे अखितयार आहले इलाकें च गै कन्नूनी निर्माण कम्में लेई 269 नोटिस जारी कीते गेन। पहलगाम च गैर कन्नूनी निर्माण बारै पुलवामा दे विधायक वहीद उर रहमान परा हुंदे आसेआ पुच्छे गेदे इक सोआलै दा परता दिंदे होई सैलसफा मैहकमे दी जिम्मेदारी साम्भ करदे मुख्यमंत्री उमर अब्दुल्ला होंरें दस्सेआ जे पहलगाम विकास प्राधिकरण नै इस मामले च 269 नोटिस जारी कीते न।

<><><><><><>

**International Women's Day**

8 माच गी मनाए जाने आहले अंतरराष्ट्रीय महिला ध्याड़े दे चेतें च साम्बा जिले च महिला सशक्तिकरण सरबंधी कार्यक्रम दा आयोजन कीता गेआ। कार्यक्रम दा आयोजन साम्बा जिले दे बीजेपी दफतर च कीता गेआ जेहदे च बीजेपी महिला मोर्चा दी प्रदेश अध्यक्ष संजीता डोगरा होंरें हिस्सा लैता। इस मौके पर उ'नें महिलाएं गी सम्मानित कीता गेआ जेहिडियां केंद्र सरकार आसेआ चलाए जा'रदी बक्ख-बक्ख योजनाएं दा फायदा हासल करा'रदियां न ते होरनें लोकें गी बी इनें योजनाएं थमां फायदा हासल करने च मदाद करा'रदियां न। इस मौके पर लक्खपति दीदी, बलॉक परमंडल थमां प्रीति देवी ते साम्बा दी भारतीय करसान महिला राधिका रानी होंरें अपने अनुभव सांझे करदे होई आखेआ।

<><><><><><>

## Poonch-SCS

पुंछ दे डिप्टी कमिशनर विकास कुंडल होंरें पुंछ दे बसनीकें लेई डिजिटल सेवाएं च बाददा करने दे मकसद कन्नै जिले दे बक्ख-बक्ख थाहें पर 23 आम सेवां केंद्रें यानि Common Service Centre दा उद्घाटन कीता। इस पैहलकदमी दा मकसद पुंछ दे लोकें गी खास करियै दूर-दरेडे इलाकें च रौहने आहले लोकें गी जरूरी सरकारी सेवा ते डिजिटल सुविधां उपलब्ध करोआना ऐ। एह पैहलकदमी सरकारी सेवां, जि'यां बिल भरने, पढ़ाई-लखाई, सेहत सेवां ते माली लेन-देन सने डिजिटल सेवाएं दी पुज्ज च सुधार आहनने लेई इक बड्डी गैंस साबित होई ऐ। मीडिया कन्नै गल्लबात करदे होई पुंछ दे डिप्टी कमिशनर विकास कुंडल होंरें लोक सेवाएं च बदलास आहनने च सी.एस.सी दी भूमिका पर लोस पांदे होई आखेआ।

<><><><><><>

## Grid Udhampur

उधमपुर दे पावर ग्रिड स्टेशन च 14 करोड़ 89 लक्ख रुपें दी लागत कन्नै 160 एमवीए दी समर्थ आहला बिजली ट्रांसमीटर चालू होने कन्नै पूरी चिनाब घाटी ते उधमपुर जिले लेई इक बड्डी उपलब्धि हासल करी लैती गई ऐ। स्हाड़े उधमपुर संवाददाता अचिन दुबे मूजब, एहदे कन्नै डोडा, किशतवाड़, रामबन ते उधमपुर दे अनगिनत लोकें दी लाह हासल होगं इस बारै मती जानकारी दिंदे होई सरबंधत ए.ई.ई किरण कुमार गुप्ता होंरें आखेआ।

<><><><><><>